

摘藻堂四庫全書薈要

史部

欽定四庫全書薈要

史部

通志卷一百三十二

詳校官員外郎臣楊世綸



欽定四庫全書薈要卷九十四十九

史部

通志卷一百三十二

宋 右廸功郎鄭樵漁仲撰

東列傳第四十五

宋

趙倫之

符子伯

蕭思話

子惠開

臧燾

孫凝之

燾弟

謝晦

晦凡瞻

弟

謝裕

孫孺子

裕弟

謝方明

子惠

連謝靈運

何長瑜

謝弘微

莊子

王弘

子錫

王微

王曇首

子僧綽

趙倫之字幼成下邳僮人孝穆皇后之弟也幼孤貧事母以孝稱武帝起兵以軍功封閬中縣五等侯累遷雍州刺史武帝北征倫之遣順陽太守傅弘之扶風太守沈田子出嶢柳大破姚泓於藍田及武帝受命以佐命功封霄城縣侯少帝即位徵拜護軍元嘉三年拜領軍將軍倫之雖外戚貴寵而居身儉素性野拙澁於人間世事多所不解久居方伯公私富貴入為護軍資力不

稱以為見貶光祿大夫范泰好戲笑謂曰司徒公缺必用汝老奴我不言汝資地所任要是外戚高秩次第所至倫之大喜每載酒肴詣泰五年卒謚元侯子伯符嗣伯符字潤遠少好弓馬為寧遠將軍總領義徒以居宮城北每火起及有劫盜輕身貫甲冑助郡縣赴討武帝甚嘉之文帝即位累遷徐兗二州刺史為政苛暴吏人畏懼如與虎狼居而劫盜遠迸無敢入境元嘉十八年徵為領軍將軍先是外監不隸領軍宜相統攝者自有

別詔至此始統領焉後為丹陽尹在郡嚴酷曹局不復堪命或委叛被錄赴水而死典筆吏取筆失旨頓與五十鞭子倩尚文帝第四女海鹽公主甚愛重倩嘗因言戲以手擊主事上聞文帝怒離婚伯符慙懼發病卒謚曰肅傳國至孫勗齊受禪國除

蕭思話南蘭陵人孝懿皇后弟子也父源之字君流歷徐兗二州刺史永初元年卒贈前將軍思話十餘歲時未知書以博誕遊遨為事好騎屋棟打細腰鼓侵暴鄰

曲莫不患毒之自此折節數年中遂有令譽好書史工  
隸書善彈琴能騎射武帝一見而奇之年十八除大司  
馬行參軍襲爵封陽縣侯元嘉中累遷振武將軍青州  
刺史時年二十七亡命司馬朗之兄弟聚黨謀為亂思  
話遣北海太守蕭汪之討斬之八年魏軍大至思話懼  
乃棄鎮奔平昌由是下廷尉仍繫尚方初在青州常所  
用銅斗覆在藥厨下忽於斗下得二死雀思話歎曰斗  
覆而雙雀殞其不祥乎既而被繫及梁州刺史甄法護

在任失和氏帥楊難當寇漢中乃自徒中起思詒為橫  
野將軍梁南秦二州刺史平漢中悉收侵地置戍葭萌  
水思詒遷鎮南鄭法護中山無極人也過江寓居南郡  
弟法崇自少府為益州刺史法護委鎮之罪為府所收  
於獄賜死文帝以法崇受任一方命言法護病卒文帝  
使思詒上定漢中本末下之史官十四年遷臨川王義  
慶平西長史南蠻校尉文帝賜以弓琴手勅曰丈人頃  
何所作事務之暇故宜以琴書為娛耳前得此琴云是



舊物今以相借并往桑弓一張理材乃快良材美器宜  
在盡用之地丈人真無所與讓也二十二年除侍中二  
十四年改領右衛將軍嘗從文帝登鍾山北嶺道中有  
盤石清泉上使於石上彈琴因賜以銀鍾酒謂曰相賞  
有松石間意思話遷寧蠻校尉雍州刺史監四州軍事  
徵為吏部尚書以去州無復事力倩府軍身九人文帝  
戲之曰丈人終不為田父於閭里何憂無人使邪未拜  
遷護軍將軍是時魏攻懸瓠文帝將大舉北侵朝士僉

同惟思話固諫不從魏師退即代孝武為徐兗二州刺史監四州軍事後為圍礪礪城不拔退師歷下為江夏王義恭所奏免官元凶弒立以為徐兗二州刺史思話率部曲還彭城起義以應孝武遣將軍申坦梁坦水陸齊驅孝武遣使至新亭坦亦進克京口上即位徵思話為尚書左僕射固辭改為中書令丹陽尹散騎常侍時都下多劫掠二旬中十數發思話引咎陳讓不許及江州刺史臧質等反以為江州刺史事平拜郢州刺史加

都督卒贈征西將軍開府儀同三司謚曰穆侯思話外  
戚令望早見任待凡歷州十二杖節監都督者九焉所  
至雖無皎皎清節亦無穢黷之累愛才好士人多歸之  
長子惠開嗣惠開少有風氣涉獵文史家雖貴戚而居  
服簡素初為祕書郎祕書著作並名家年少惠開意趣  
與人多不同比肩或三年不共語外祖光祿大夫沛郡  
劉成戒之曰汝恩戚家子無多異以取天下之疾轉太  
子舍人與汝南周朗同官友善以偏奇相尚孝建元年

為黃門侍郎與侍中何偃等爭推積射將軍徐沖之事  
偃任遇甚隆惠開不為之屈偃怒使門下推彈之惠開  
乃上表解職由此忤旨別勅有司以屬疾多免惠開官  
思話素恭謹操行與惠開不同常以其峻異每加嫌責  
及見惠開自解表歎息曰兒子不幸與周朗周旋理應  
如此杖之二百尋除中庶子丁父艱居喪有孝性家素  
事佛凡為父起四寺南崗下名曰禪崗寺曲阿舊鄉宅  
名曰禪鄉寺京口墓亭名曰禪亭寺所封封陽縣名曰

禪封寺謂國僚曰封秩鮮而兄弟多若全關一人則在我所讓若人人等分又事可悲恥寺衆既立自宜悉供僧衆由此國秩不復下均襲封封陽縣侯為新安王子鸞冠軍長史惠開妹當適桂陽王休範女又當適孝武子發遣之資應須二十萬乃以為豫章內史聽其肆意聚納由是在郡著貪暴之聲再遷御史中丞孝武與劉秀之詔曰今以蕭惠開為憲司冀當稱職但一往服領已自殊有所震及在職百僚畏憚之後授督益寧二州

刺史路經江陵時吉翰子在荊州共惠開有舊為設女樂樂人有美者惠開就求不得又欲以四女妓易不許惠開怒收吉斬之即納其妓啓云吉為劉義宣所遇交結不逞向臣毀訕朝政輒已戮之孝武稱快惠開素有大志及至蜀欲廣植經略善於敘述對賓僚及士人說欲收梓扞越嶲以為內地綏討蠻濮闢地調租聞其言者皆以為大功可立才疎意廣終無所成明識過人嘗供三千沙門一閱其名退無所失明帝即位進號平西

將軍改督為都督晉安王子勛反惠開乃集將佐謂之  
曰湘東太祖之昭晉安世祖之穆其於當璧並無不可  
但吾荷世祖之眷今便當投袂萬里推奉九江乃遣巴  
郡太守費欣壽領二千人東下軍悉敗沒先是惠開為  
治多任刑誅蜀土咸怨號曰卧虎及聞軍沒諸郡悉反  
並來圍城城內東兵不過二千凡蜀人惠開疑之悉皆  
遣出子勛尋敗蜀人並欲屠城以望重賞明帝以蜀土  
險遠赦其誅責遣其弟惠基使蜀宣旨而蜀人志在屠

城不使王命速達過留惠基惠基破其渠帥然後得前  
惠開奉旨歸順城圍得解明帝又遣惠開宗人寶首水  
路慰勞益州寶首欲以平蜀為功更獎說蜀人處處蜂  
起惠開乃啓陳情事遣永寧太守蕭惠訓州別駕費欣  
業分兵並進大破之禽寶首送之惠開至都明帝問其  
故侍御左右莫不悚然側目惠開舉動自若從容答曰  
臣唯知逆順不識天命又云非臣不亂非臣不平初惠  
開府錄事參軍劉希微負蜀人責將百萬為責主所制



未得俱還惠開與希微共事不厚而廐中凡有馬六十匹悉以乞希微償責其意趨不常如此惠開還資二千餘萬悉散道俗一無所留後除桂陽王休範征北長史南東海太守其年會稽太守蔡興宗之郡惠開自京口請假還都相逢於曲阿惠開先與興宗名位畧同又經情款自以負釁摧屈慮興宗不能詣已戒勒部下蔡會稽部伍若問慎不得答惠開素嚴部下莫敢違興宗見惠開舟力甚盛遣人訪訊事力二三百人皆低頭直去

無一人答者尋除少府加給事中惠開素剛至是益不得志曰大丈夫當入管喉舌出泣方伯乃復低頭人中邪寺內所住齋前嚮種花草甚美惠開悉剋除別種白楊每謂人曰人生不得行胃懷雖壽百歲猶為夭也發病嘔血吐物如肝肺者卒子睿嗣齊受禪國除惠開與諸弟並不睦惠基使至益州遂不相見與同產弟惠明亦致嫌隙云惠明其次弟也亦有時譽泰始初為吳興太守郡界有卞山山下有項羽廟相承云羽多居郡聽

事前後太守不敢上惠明謂綱紀曰孔季恭嘗為此郡  
未聞有災遂盛設筵榻於聽事接賓數日見有一人長  
丈餘張弓挾矢向惠明既而不見因發背旬日而卒惠  
基列在齊史

臧燾字德仁東莞莒人武帝敬皇后兄也少好學善三  
禮貧約自立操行為鄉里所稱晉太元中左衛將軍謝  
安始立國學徐兗二州刺史謝玄舉燾為助教晉孝武  
帝追崇庶祖母宣太后議者謂宜配食中宗燾議曰陽

秋之義母以子貴故仲子成風咸稱夫人經言考仲子宮若配食惠廟則宮無緣別築前漢孝文孝昭太后並繫子為號祭於寢園不配於高祖孝武之廟後漢和帝之母曰恭懷皇后安帝祖母曰敬隱皇后順帝之母曰恭愍皇后雖不繫子為號亦祭於陵寢不配章安二帝此則二漢雖有太后皇后之異至於並不配食義同陽秋唯光武追廢呂后故以薄后配高廟又衛后既廢霍光追尊李夫人為皇后配孝武廟此非母以子貴之例

直以高武二廟無配故耳又漢世立寢於陵自是晉制  
所異謂宜遠准陽秋考宮之義近慕二漢不配之典尊  
號既正則罔極之情申別建寢廟則嚴禰之義顯繫子  
為稱兼明母貴之所由一舉而允三義固哲王之高致  
也議者從之頃之去官以父母老家貧與弟熹俱棄人  
事躬耕自業約已養親者十餘年父母喪亡居喪六年  
以毀瘠著稱武帝義旗建參右將軍何無忌軍事隨府  
轉鎮南參軍武帝鎮京口參帝中軍軍事入補尚書度

支郎改掌祠部襲封高陵亭侯時太廟鴟尾災燾謂著作郎徐廣曰昔孔子在齊聞魯廟災曰必桓僖也今征西京兆四府君宜在毀落而猶列廟饗此其徵乎乃上議曰臣聞國之大事在祀與戎將營宮室宗廟為首古先哲王莫不致肅恭之誠心盡崇嚴乎祖考然後能流淳化於四海通幽感於神明固宜詳廢興於古典修情禮以求中者也禮天子七廟三昭三穆與太祖而七自考廟以至祖考五廟皆月祭之遠廟為祧有二祧享嘗

乃止去祧為壇去壇為墀有禱然後祭之此宗廟之次  
親疏之序也鄭玄以為祧者文王武王之廟王肅以為  
五世六世之祖尋去祧之言則祧非文武之廟矣文武  
周之祖宗何云去祧為壇乎明遠廟為祧者無服之祖  
也又遠廟則有享嘗之降去祧則有壇墀之殊明世遠  
者其義彌疏也若祧是文武之廟宜同月祭於太祖雖  
推后稷以配天由功德之所始非尊崇之義再有差降  
也又禮有以多為貴者故傳稱德厚者流光德薄者流

卑又言自上以下降殺以兩禮也此則尊卑等級之典  
上下殊異之文而云天子諸侯俱祭五廟何哉又王祭  
嫡殤下及來孫而上祀之禮不過高祖推隆恩於下流  
替誠敬於尊屬亦非聖人制禮之意也是以泰始建廟  
從王氏議以禮父為士子為天子諸侯祭以天子諸侯  
其尸服以士服故上及征西以備六世之數宣皇雖為  
太祖尚在子孫之位至於殷祭之日未申東向之禮所  
謂子雖齊聖不先父食者矣今京兆以上既遷太祖始



得居正議者以昭穆未足欲屈太祖於卑坐臣以為非  
禮典之旨也所謂與太祖而七自是昭穆既足太廟在  
六世之外非為須滿七廟乃得居太祖也議者又以四  
府君神主宜永同於殷祫臣又以為不然傳所謂絜  
之主陳乎太祖謂太祖以下先君之主也故白虎通云  
禘祫祭遷廟者以其繼君之體持其統而不絕也豈如  
四府君在太祖之前非繼統之主無靈命之瑞非王業  
之基昔以世近而及今則情禮已遠而當長饗殷祫永

虛太祖之位求之禮籍未見其可昔永和之初大議斯禮于時虞喜范宣並以洪儒碩學咸謂四府君神主無緣永存於百世或欲瘞之兩階或欲藏之石室或欲為之改築雖所執小異而大歸是同若宣皇既居羣廟之上而四主禘祫不已則大晉殷祭長無太祖之位矣夫理貴有中不必過厚禮與世遷豈可順而不斷故臣子之情雖篤而靈厲之謚彌彰追遠之懷雖切而遷毀之禮為用豈不有心於加厚顧禮制不可踰耳石室則藏

於廟北改築則未知所處虞主所以依神神移則有瘞  
埋之禮四主若饗祀宜廢亦神之所不依也准傍事例  
宜同虞主之瘞埋然經典難詳羣言錯謬非臣淺識所  
能折衷時學者多從肅議竟未施行武帝受命拜太常  
雖外戚貴顯而彌自沖約茅屋蔬飧不改其舊所得祿  
奉與親戚共之永初三年致事拜光祿大夫加金章紫  
綬卒少帝贈左光祿大夫長子遂宜都太守遂子凝之  
學涉有當世才與司空徐湛之為異常之交時年少與

傅僧祐俱以通家子弟始為文帝所引見時上與何尚之論鑄錢事凝之便干其語次上因回與語僧祐引凝之夜令止凝之大言曰明主難再遇便應盡所懷上與往復十餘反凝之辭韻詮序上甚賞焉後為尚書左丞以徐湛之黨為元凶所殺凝之子寅字士若事在沈攸之傳寅弟稜後軍參軍稜子嚴梁史有傳燾弟燾字義和與燾並好經學隆安初兵起燾乃習騎射志立功名嘗與溧陽令阮崇會獵遇猛虎突圍獵徒並散燾直前

射之應弦而倒從武帝入京城進至建業桓玄走武帝  
便使熹入宮收圖書器物封府庫有金飾樂器武帝問  
熹卿欲此乎熹正色曰主上幽逼播越非所將軍首建  
大義劬勞王室雖復不肖實無情於樂帝笑曰聊以戲  
耳以建義功封始興縣五等侯參武帝車騎中軍事武  
帝將征廣固議者多不同熹贊成其行武帝遣朱齡石  
統大衆伐蜀命熹督奇兵出中水領建平巴東二郡太  
守蜀主譙縱遣大將譙撫之屯牛脾又遣譙小苟以重

兵塞打鼻燾至牛脾斬撫之成都平燾遇疾卒於蜀追  
贈光祿勳子質字含文少好鷹犬善捕博意錢之戲長  
六尺七寸出面露口禿頂拳髮年未二十武帝以為世  
子中軍參軍嘗詣護軍趙倫之倫之名位已重不相接  
質憤然起曰大丈夫各以老嫗作門戶何至以此中相  
輕倫之慙謝質拂衣而去後為江夏王義恭參軍以輕  
薄無檢為文帝所嫌徙給事中會稽長公主每為之言  
乃出為建平太守甚得蠻楚心歷竟陵內史巴東建平

二郡太守南蠻校尉劉湛還朝稱為良牧遷寧遠將軍  
歷陽太守質年始出三十屢居名郡涉獵文史尺牘便  
敏有氣幹好言兵文帝謂可大任徵為徐兗二州刺史  
加都督在鎮奢費爵命無章為有司所糾遇赦與范曄  
徐湛之等厚善曄謀反量質必與之同會事發質復為  
義興太守元嘉二十七年遷南譙王義宣司空司馬南  
平內史未之職會魏太武帝圍汝南戍主陳憲固守告  
急文帝遣質往壽陽與安蠻司馬劉康祖救憲魏兵退

走因使質伐汝南西境刀壁等山蠻大破之獲萬餘口  
遷太子左衛率坐枉殺隊主免官魏太武率兵數十萬  
向彭城遂以質為輔國將軍置佐率萬人北救始至盱  
眙太武已過淮質與胡崇之毛熙作三營大為魏軍所  
敗質軍奔散棄輜重器甲將七百人投盱眙盱眙太守  
沈璞城內有實力三千質因共固守魏初南出復無資  
糧唯以萬姓為命又過淮食平越石鰲二屯穀至是抄  
掠無所人馬饑困聞盱眙有積粟欲為歸路之資二十



八年正月太武自廣陵北返悉力攻盱眙就質求酒質  
封浚便與之太武怒甚築長圍一夜便合太武與質書  
陳以禍福質答書曰爾不聞童謠言邪虜馬飲江水佛  
狸死卯年冥期使然非復人事寡人受命相滅期之白  
登師行未遠值爾自送死豈容復令爾生饗有桑乾哉  
假令寡人不能殺爾爾亦由我而死爾若有幸得為亂  
兵所殺爾若不幸則生相鎖縛載以一驢負送都市爾  
識智及衆豈能勝苻堅邪頃年展爾陸梁者是爾未飲

江水太歲未卯故耳時魏地童謠曰輶車北來如穿雉  
不意虜馬飲江水虜主北歸石濟死虜欲渡江天不徙  
故質答書引用之太武大怒乃作鐵牀於其上施鐵鑊  
云破城得質當坐之此上質又與魏軍書并寫臺格與  
之購斬太武封開國侯萬戶賜布絹各萬疋魏以鉤車  
鉤垣樓城內繫絙數百人叫呼引之車不能退質夜以  
木桶盛人縣出城外截鉤獲之明日魏又以衝車攻城  
城上堅密每頽落下不過數斗魏軍乃肉薄登城墜而

復升莫有退者殺傷萬計死者與城平如此三旬太武聞彭城斷其歸路京邑遣水軍自海入淮乃解圍去上嘉質功以為冠軍將軍寧蠻校尉雍州刺史監四州諸軍事明年文帝又北伐使質率見力向潼關質頓兵不肯時發顧戀嬖妾棄軍營壘單馬還城散用臺庫見錢六七百萬為有司所糾上不問元凶弒立以質為丹陽尹質家遣門生師顗報質具言文帝崩問質遣馳告司空義宣及孝武帝而自率衆五千馳下討逆自陽口進

江陵見義宣時質諸子在都聞質舉義並逃亡義宣始得質報即日舉兵馳信報孝武版進質號征北將軍質徑赴尋陽與孝武同下至新亭孝武即位加質為車騎將軍開府儀同三司都督江州諸軍事江州刺史質率所領自白下步上直至廣莫門薛安都程天祚等亦自南掖門入與質同會入太極殿生擒元凶仍使質留朝堂封始興郡公之鎮舫千餘乘部伍前後百餘里六平乘並施龍子幡時孝武自攬威柄而質以少主遇之是

事專行多所欲及至尋陽刑政慶賞不復咨稟朝廷  
甚相猜忌質自謂人才足為一世英傑始聞國禍便有  
異圖以義宣凡閭易制欲外相推奉以成其志及至江  
陵便致拜稱名質於義宣雖為兄弟而年近六十歲義  
宣驚曰君何意拜弟質曰事中宜然時義宣已推崇孝  
武故其計不行質每慮事泄及至新亭又拜江夏王義  
恭義恭愕然問質所以質曰天下屯危禮異常日前在  
荊州亦拜司空會義宣有憾於孝武質自此密信說誘

陳朝廷得失又謂震主之威不可持久主相勢均事不  
兩立今專據閭外地勝兵彊持疑不決則後機致禍質  
女為義宣子棕妻義宣謂質無復異同故納其說且義  
宣將佐蔡超竺超民等咸有富貴情願又勸義宣義宣  
時未受丞相質子敦為黃門侍郎奉詔敦勸道經尋陽  
質令敦具更譬說義宣義宣意乃定馳報豫州刺史魯  
爽期孝建元年秋同舉爽失旨即便起兵遣人至都報  
弟瑜瑜席卷赴叛瑜弟弘為質府佐孝武馳使報質誅

弘質於是執臺使狼狽舉兵馳報義宣上表稱誅君側之惡孝武遣撫軍將軍柳元景統豫州刺史王元謨等水軍屯梁山洲內兩岸築偃月壘以待之元景檄書宣告征鎮而義宣亦相次繼至江夏王義恭與義宣書曰臧質少無美行弟所具悉今藉西楚之彊力圖濟其私昔桓元借兵於仲堪有似今日凶謀若果恐非復池中物也義宣由此疑之質進計於義宣曰今以萬人取南洲則梁山中絕萬人綴元謨必不敢輕動質浮舟外江

直向石頭此上略也義宣將從之義宣客顏樂之說義宣曰質若復拔京城則大功盡歸之矣宜遣麾下自行義宣遣腹心劉湛之就質陳軍城南元謨留羸弱守城悉精兵出戰薛安都騎軍前出垣護之督諸將乘之乃大潰質求義宣欲計事義宣密已走矣質不知所為亦走至尋陽焚府舍載妓妾入南湖摘蓮噉之追兵至質窘急以荷覆頭沈於水中出鼻軍士鄭俱兒望見射之中心兵刃亂至腸胃纏縈水草隊主裘應斬質傳首建



業錄尚書江夏王義恭等奏依漢王莽事例漆其頭藏于武庫庶為監戒昭示將來詔可

謝晦字宣明陳郡陽夏人晉太常裒之元孫也裒子奕據安萬鐵並著名前史據子朗字長慶位東陽太守朗子重字景重位會稽王道子驃騎長史重生絢瞻晦瞻遜絢位至文帝鎮軍長史早卒晦初為孟昶建威府中兵參軍昶死武帝問劉穆之孟昶參軍誰堪入府穆之舉晦即命為太尉參軍武帝嘗訊獄其旦刑獄參軍有

疾以晦代之晦於車中一覽訊牒隨問酬辯曾無違謬  
帝奇之即日署刑獄賊曹累遷太尉主簿從征司馬休  
之時徐達之戰敗見殺武帝怒將自登岸諸將諫不從  
晦前抱持武帝帝曰我斬卿晦曰天下可無晦不可無  
公晦死何有會胡藩已得登岸賊退走乃止晦美風姿  
善言笑眉目分明鬢髮如黑漆涉獵文義博瞻多通時  
人以方楊德祖微將不及晦聞猶以為恨武帝深加愛  
賞羣僚莫及從征關洛內外要任悉委之帝於彭城大

會命紙筆賦詩晦恐帝有失起諫帝即代作曰先蕩臨  
淄穢却清河洛塵華陽有逸驥桃林無伏輪於是羣臣  
並作時謝混風華為江左第一嘗與晦俱在武帝前帝  
目之曰一時頓有兩玉人耳劉穆之遣使陳事晦往往  
異同穆之怒曰公復有還時不及帝欲以晦為從事中  
郎穆之堅執不與故晦終穆之世不遷及穆之喪問至  
帝哭之甚慟曰喪我賢佐晦時正直喜甚自入閤參審  
其日教出轉晦從事中郎宋臺初建為右衛將軍加侍

中武帝聞咸陽陷沒欲復北伐晦諫以為士馬疲怠乃止於是登城北望慨然不悅乃令羣僚誦詩晦詠王粲詩曰南登灞陵岸回首望長安悟彼下泉人喟然傷心肝帝流涕不自勝及帝受命於石頭登壇備法駕入宮晦領游軍為警備加中領軍以佐命功封武昌縣公永初二年坐行璽封鎮西司馬南郡太守王華而誤封北海太守勅免晦侍中尋轉領軍將軍加散騎常侍依晉中軍羊祜故事入直殿省總統宿衛及帝不豫給班劍

二十人與徐羨之傅亮檀道濟並侍醫藥少帝立加領中書令與徐傅共秉政少帝既廢徐羨之錄詔命以晦領護南蠻校尉都督荆湘雍益寧南北秦七州諸軍事荊州刺史加都督欲令居外為援慮文帝至或別用人故遽有此授精兵舊將悉以配之器仗軍資甚盛文帝即位加使持節依本位除授晦慮不得去甚憂惶及發新亭顧石頭城喜曰今得脫矣進封建平郡公固讓尋給鼓吹一部至江陵深結侍中王華冀以免禍二女當

配彭城王義康新野侯義賓元嘉二年遣妻及長子世休送女還都先是景平中魏師攻取河南至是帝欲誅羨之等并討晦聲言北伐又言拜京陵治裝舟艦傅亮與晦書言薄伐河朔事猶未已朝野之慮憂懼者多又言當遣外監萬幼宗往時朝廷處分異常其謀頗泄三年正月晦弟黃門侍郎朐馳使告晦晦猶謂不然呼諮議參軍何承天示以亮書曰計幼宗一二日必至傅公慮我好事故先遣此書承天曰外間所聞咸謂西討已

定幼宗豈有上理晦尚謂虛使承天豫立答詔啓草北  
行宜須明年江夏內史程道慧得尋陽人書言朝廷將  
有大處分其事已審使參軍樂景封以示晦晦問計於  
承天承天對曰蒙將軍殊顧常思報德事變至此何敢  
隱情然明日戒嚴動用軍法區區所懷懼不得盡晦懼  
曰卿豈欲我自裁邪承天曰尚未至此其在境外耳晦  
曰荊州用武之地兵糧易給聊且決戰走復何晚吾不  
愛死負先帝之顧如何又謂承天曰幼宗尚未至若後

一二日無消息便是不復來也承天曰程說其事已判  
豈容復疑晦欲焚南蠻兵籍率見力決戰土人多勸晦  
發兵晦問諸將戰士三千足守城乎南蠻司馬周超曰  
三千人非徒足以守城若有外寇亦可立勲司馬庾登  
之請解司馬南郡太守以授之晦即命超為司馬轉登  
為長史文帝誅羨之等及晦子世休收矚矚子世平凡  
子紹等樂景又使告晦徐傳二公及矚等並已誅晦先  
舉羨之亮哀次發子弟山問既而自出射堂配衣軍旅



晦數從武帝征討備見經畧至是指麾處分莫不曲盡  
其宜三日中四遠投集得精兵三萬乃奉表言臣等若  
志欲專權不顧國典便當輔翼幼主孤背天日豈得沿  
流三千虛館三月奉迎鑾駕以遵下武故廬陵王於榮  
陽之世屬被猜嫌積怨犯上自貽非命不有所廢將何  
以興耿弇不以賊遺君父臣亦何負於宋室邪又言美  
之亮無罪見誅王弘兄弟輕躁昧進王華猜忌忍害今  
將興晉陽之甲以誅君側之惡時帝已戒嚴諸軍相次

進路尚書符下荊州數晦之罪令荊州誅之言衆軍十道並進符到其即共收晦身輕舟護送時益州刺史蕭摹之巴西太守劉道產被徵還始至江陵晦並繫執沒其財貨以充軍資竟陵內史殷道鸞未之郡晦以為諮議參軍又以弟遼為冠軍將軍總留任晦率衆二萬發自江陵舟艦列自江津至于破冢旌旗相照蔽奪日光晦嘆曰恨不得以此為勤王之師自領湘州刺史晦至江口到彥之已到彭城洲晦司馬庾登之據巴陵畏懦

不敢進會霖雨連日參軍劉和之曰彼此共有雨耳檀  
征北尋至東軍方彊唯宜速伐登之怯使小將陳祐作  
大囊貯茅數千斛掛於颿檣云可以焚艦用火宜須晴  
以緩戰期晦然之遂停軍十五日乃攻蕭欣於彭城洲  
彥之退保隱圻初晦與徐羨之傅亮謀為自全之計晦  
據上流而檀道濟鎮廣陵各有彊兵足以制持朝廷羨  
之亮於中秉權可得持久及文帝將行誅王華之徒咸  
云道濟不可信帝曰道濟止於脅從本非事主殺害之

事又所不關吾召而用之必不有異於是詔道濟入朝  
委之西討晦聞羨之等死謂道濟必不獨全及聞率衆  
來上遑懼無計道濟既至與彥之軍合晦始見艦數不  
多輕之不即出戰至晚因風颿上前後連咽西人離沮  
無復關心臺軍列艦過江晦軍一時潰散晦夜出投巴  
陵得小船還至江陵初雍州刺史劉粹遣弟竟陵太守  
道濟與臺軍主沈敞之襲江陵至沙橋周超大破之俄  
而晦至江陵無他唯愧謝周超而已超其夜詣到彥之

降晦乃攜其弟遯及兄子世基等七騎北走遯肥壯不能騎馬晦待之行不得速至安陸延頭為戍主光順之所執順之晦故吏也檻送京都於路作悲人道之詞以自哀其語甚工周超既降到彥之以參府事劉粹遣告彥之沙橋之事敗由周超彥之乃執超與晦等並伏誅世基絢之子也有才氣臨死為連句詩曰偉哉橫海鱗壯矣垂天翼一旦失風水翻為螻蛄食晦續之曰功遂倖昔人保退無智力既涉太行險斯路信難陟晦女為

彭城王義康妃聰明有才貌被髮徒跣與晦訣曰阿父  
大丈夫當橫屍戰場柰何狼藉都市言訖大叫而絕行  
人為之落淚晦死時年三十七庾登之殷道鸞何承天  
自晦以下並見原晦次兄瞻字宣遠一曰名檐字通遠  
六歲能屬文為紫石英贊果然詩為當時才士歎異與  
從叔混族弟靈運俱有盛名嘗作喜霽詩靈運寫之混  
詠之王弘在坐以為三絕瞻幼孤叔母劉撫養有恩兄  
弟事之同於至親劉弟柳為吳郡將姊俱行瞻不能違

遠自楚臺祕書郎解職隨從故為柳建成長史復為武  
帝相國從事郎晦時為宋臺右衛權遇已重於彭城還  
都迎家賓客輻湊時瞻在家驚駭謂晦曰吾家以素退  
為業汝遂勢傾朝野此豈門戶福邪乃籬隔門庭曰吾  
不忍見此後因宴集靈運問晦潘陸與賈充優劣晦曰  
安仁諂於權門士衡邀競無已並不能保身自求多福  
公閭勲名佐世不得為並靈運曰安仁士衡才為一時  
之冠方之公閭本自遼絕瞻斂容曰若處貴而能遺權

斯則是非不得而生傾危無因而至君子以明哲保身  
其在此乎常以裁止晦如此及還彭城言於武帝曰臣  
本素士父祖位不過二千石弟年始三十志用凡近位  
任顯密福過災生特乞降黜以保衰門前後屢陳帝欲  
以瞻為吳興郡又自陳請乃以為豫章太守晦或以朝  
廷密事語瞻瞻輒向親舊說以為戲笑以絕其言晦雖  
建佐命功瞻愈憂懼永初二年在郡遇疾不療幸於不  
永晦聞疾奔往瞻見之曰汝為國大臣又總戎重遠出



必生疑謗時果有詐告晦反者瞻疾篤還都帝以晦任  
禁旅不便出宿使瞻居于晉南郡公主壻羊賁故第在  
領軍府東門瞻曰吾有先人敝廬何為於此臨終遺晦  
書曰吾得歸骨山足亦何所多恨弟思自勉為國為家  
卒時年三十五瞻文章之美與從叔混族弟靈運相抗  
靈運父瑒無才能為祕書郎早卒而靈運好臧否人物  
混患之欲加裁折未有其方謂瞻曰非汝莫能乃與晦  
瞻弘微等共遊戲使瞻與靈運共車靈運登車便商較

人物瞻謂曰祕書早亡談者亦互有同異靈運默然言  
論自此哀止晦弟矚字宣鏡年數歲所生母郭氏疾矚  
晨昏溫清勤容戚顏未嘗暫改恐僕役營疾懈倦躬自  
執勞為母疾畏驚而微踐過甚一家尊卑感矚至性咸  
納屢行屏氣語如此者十餘年位黃門侍郎從坐伏誅  
晦從叔澹字景恒祖安晉太傅父瑤琅邪王友澹任達  
仗氣不營當世與順陽范泰為雲霞之交歷位尚書武  
帝將受禪有司議使侍中劉劭進璽帝曰此選當須人

望乃使澹攝澹嘗侍帝宴酣飲大言無所屈鄭鮮之欲  
按之帝以澹方外士不宜以規矩繩之然意不悅不以  
任寄後復侍飲醉謂帝曰陛下用羣臣但須委屈順者  
乃見貴沒黜之徒無用也帝大笑景平中累遷光祿大  
夫從子晦為荊州將之鎮詣澹別晦色自矜澹問晦年  
答曰三十五澹笑曰昔荀中郎年二十九為北府都督  
卿比之已為老矣晦色甚愧元嘉中位侍中特進金紫  
光祿大夫卒初澹從弟混與劉毅昵澹常以為憂漸疎

混每謂弟璞從子瞻曰益壽此性終當破家混尋見誅  
朝廷以澹先言故不及禍璞字景山幼孝友祖安深賞  
愛之位光祿勳

謝裕字景仁晦從父也名與武帝同故以字行祖據太  
傅安第二弟父允宣城內史景仁幼時與安相及為安  
所知始為前軍行參軍會稽王世子元顯廢人張法順  
權傾一時內外無不造門唯景仁不至年三十方為著  
作佐郎桓玄誅元顯見景仁甚知之謂四坐曰司馬庶

人父子云何不敗遂令謝景仁三十方著作佐郎玄  
為太尉以補行參軍玄建楚臺以補黃門侍郎及篡位  
領驍騎將軍景仁博聞彊識善敘前言往行玄每與之  
言不倦也玄出行殷仲文卞範之之徒皆騎馬散從而  
使景仁陪輦武帝為桓修撫軍中兵參軍嘗詣景仁諮  
事景仁與語悅之因留武帝共食食未辨而景仁為玄  
所召玄性促急俄頃間騎詔續至帝屢求去景仁不許  
曰主上見待要應有方我欲與客共食豈不得待竟安

坐飽食然後應召帝甚感之又謂景仁是太傅安孫及平京邑入鎮石頭景仁與百寮同見帝帝目之曰此名公孫也謂景仁曰承制府須記室今當相屈遂授之歷位鎮軍司馬復為車騎司馬武帝內難既寧思宏外略將伐鮮卑朝議皆謂不可劉毅時鎮姑熟固止武帝以為苻堅侵境謝太傅猶不自行宰相遠出傾動根本景仁獨曰公建桓文之烈應天之心興復皇祚芟夷奸逆雖業高振古而德刑未樹宜推亡固存廣振威略鮮

卑密邇疆甸屢犯邊垂伐罪弔民於是乎在平定之後  
養銳息徒然後觀兵洛汭修復園寢豈有坐長寇虜縱  
敵貽患者哉帝從之遂北伐大司馬琅邪王天子母弟  
屬當儲副武帝深以根本為憂轉景仁為大司馬左司  
馬專總府任又遷吏部尚書時從兄混為左僕射依制  
不得相監臨武帝啓依僕射王彪之尚書王劭前例不  
解職坐選吏部令史邢安泰為都令史平原太守二官  
共除安泰以令史職拜謁陵廟為御史中丞鄭鮮之所

糾白衣領職十一年轉左僕射景仁性矜嚴整潔居宇  
淨麗每唾着左右人衣事畢即聽一日澣濯故每欲唾  
左右爭來受之武帝雅相知重申以婚姻廬陵王義真  
妃景仁女也十二年卒年四十七贈金紫光祿大夫葬  
日武帝親臨之甚慟子恂位鄱陽太守恂子孺子少與  
族兄莊齊名多藝能尤善聲律車騎將軍王彧孺子姑  
之子也嘗與孺子宴桐臺孺子吹笙或自起舞既而嘆  
曰今日真使人飄飄有伊洛間意為新安王主簿出為



廬江郡及辭孝武帝謂有司曰謝孺子不可屈為小郡  
乃以為司徒主簿後以家貧求為西陽太守卒官子璟  
璟子微列在梁史景仁弟純字景懋劉毅鎮江陵以為  
衛軍長史南平相及王鎮惡襲毅毅時病佐史聞兵至  
馳還入府左右引車欲還外解純叱之曰我人吏也逃  
欲安之及毅兵敗衆散純遂為亂兵所殺純弟彪字景  
彪位司徒右長史彪弟述字景先小字道兒少有至行  
隨純在江陵純遇害述奉純喪還都至西塞遇暴風純

喪舫流漂不知所在述乘小船尋求經純妻庾舫過庾遣人謂曰小郎去必無及寧可存亡俱盡邪述號泣答曰若安全至岸尚須營理如其已致意外述亦無心獨存因冒浪而進見純喪幾沒述號叫呼天幸而獲免咸以爲精誠所致武帝聞而嘉之及臨豫州諷中正以述為主簿甚被器遇景仁愛彪而憎述嘗設饌請武帝希命彪豫坐而帝召述述知非景仁夙意又慮帝命之請急不從帝馳遣呼述須臾至乃飧其見重如此及景仁疾述

盡心視湯藥飲食必嘗而後進衣不解帶不盥櫛者累旬景仁深感愧焉友愛遂篤及景仁卒哀號過禮景仁肥壯買材數具皆不合用述哀惶親選廼獲焉為太尉參軍從征司馬休之封吉陽縣五等候元嘉二年拜中書侍郎後為彭城王義康驃騎長史領南郡太守義康入相述又為司徒左長史轉左衛將軍涖官清約私無宅舍義康遇之甚厚尚書僕射殷景仁領軍將軍劉湛並與述為異常之交述美風姿善舉止湛謂人曰我見

謝道兒未嘗足雍州刺史張邵以黷貨將致大辟述表  
陳邵先朝舊勲宜蒙優貸文帝手詔酬納焉述語子綜  
曰主上矜邵夙誠自將曲恕吾所啓謬會故特見納若  
此迹宣布則為侵奪主恩使綜對前焚之帝後謂邵曰  
卿之獲免謝述有力焉述有心虛疾性理時或乖謬卒  
於吳興太守喪還未至都數十里殷景仁劉湛同乘迎  
赴望船流涕及劉湛誅義康外鎮將行歎曰謝述每勸  
吾退劉湛唯勸吾進述亡而湛存吾所以得罪也文帝

亦曰謝述若存義康必不至此三子綜約緯綜有才藝  
善隸書為太子中舍人與范曄謀反伏誅約亦死緯尚  
文帝第五女長城公主素為綜約所憎免死徙廣州孝  
建中還都方雅有父風位正員郎子朶齊史有傳

謝方明裕從祖弟也祖鐵字鐵石位永嘉太守父沖字  
秀度中書郎家在會稽病歸為孫恩所殺贈散騎常侍  
方明隨伯父吳興太守邈在郡孫恩寇會稽東土諸郡  
響應吳興人胡桀部驃破東遷縣方明勸邈避之不從

賊至被害方明逃免初邈舅子長樂馮嗣之及北方學士馮翊仇元達俱投邈邈禮待甚簡二人並恨遂與恩通謀劉牢之謝琰等討恩恩走臨海嗣之等不得同去方更聚合方明體素羸弱而勇決過人結邈門生討嗣之等悉禽手刃之時亂後吉凶禮廢方明合門遇禍資產無遺而營舉凶事盡力數月葬送並畢平世備禮無以加也頃之孫恩重陷會稽謝琰見害因購方明甚急方明於上虞載母妹奔東陽由黃蘗嶠出鄱陽附載還

都寄居國子學流離險厄屯苦備經而貞履之操在約  
無改桓玄克建業丹陽尹下範之勢傾朝野欲以女嫁  
方明方明終不回桓玄聞而賞之即除著作佐郎從兄  
景仁舉為武帝中軍主簿方明知無不為帝謂曰愧未  
有瓜行之賞且當與卿共豫章國祿屢加賞賜方明嚴  
恪善自居遇雖暗室未嘗有惰容從兄混有重名唯歲  
節朝拜而已丹陽尹劉穆之權重當時朝野輻湊其不  
至者唯混方明郝僧施蔡廓四人而已穆之甚恨及混

等誅後方明廓來往造穆之穆之大悅白武帝曰謝方明可謂名家駒及蔡廓直置並台鼎人無論復有才用頃之轉從事中郎仍為左將軍道憐長史武帝令府中衆事皆諮決之隨府轉中軍長史尋加晉陵太守復為驃騎長史南郡相委任如初嘗年終江陵縣獄囚事無輕重悉放歸家使過正三日還到罪重者二十餘人網紀以下莫不疑懼時晉陵郡送故主簿弘季咸徐壽之並隨在西固諫以為昔人雖有其事或是記籍過言且



當今人情偽薄不可以古義相許方明不納一時遣之  
囚及父兄驚喜涕泣以為就死無恨至期有重罪一人  
醉不能歸違二日乃反餘一囚十日不來五官朱千期  
請見欲白討之方明知為囚事使左右謝五官不須入  
囚自當反囚逡巡墟里不能自歸鄉村責讓率領將送  
竟無逃者遠近歎服焉武帝受命位侍中丹陽尹有能  
名轉會稽太守江東人戶殷盛風俗峻刻疆弱相陵姦  
吏蜂起符書一下文攝相續方明深達政體不拘文法

濶畧苛細務在統領貴族豪士莫敢犯禁除比伍之坐  
判久繫之獄前後征伐每兵運不充悉倩士庶事寧皆  
使還本而守宰不明與奪乖繆人事不至必被抑塞方  
明簡汰精當各順所宜東土稱詠之性尤愛惜人物未  
嘗有所是非承代前人不易其政必宜改者則漸變使  
無迹可尋卒官子惠連十歲能屬文族兄靈運嘉賞之  
云每有篇章對惠連輒得佳句嘗於永嘉西堂思詩竟  
日不就忽夢見惠連即得池塘生春草大以為工常云

此有神助非吾語也本州辟主簿不就惠連先愛幸會  
稽郡吏杜德靈及居父憂贈以五言詩十首乘流遵歸  
路諸篇是也坐廢不預榮位尚書僕射殷景仁愛其才  
為言於文帝曰此文臣小兒時見之非惠連也帝曰若  
此便應通之元嘉七年方為司徒彭城王義康法曹行  
參軍義康修東府城城塹中得古冢為之改葬使惠連  
為祭文留信待成其文甚美又為雪賦以高麗見奇靈  
運見其新文每曰張華重生不能易也文章並行於世

年三十七卒既早亡輕薄多尤累故官不顯無子惠連弟惠宣位臨川太守

謝靈運安西將軍弈之曾孫而方明之從子也祖玄晉車騎將軍父瑒生而不慧位祕書郎早亡靈運幼便穎悟玄甚異之謂親知曰我乃生瑒瑒兒何為不及我靈運少好學博覽羣書文章之美與顏延之為江左第一縱橫俊發過於延之深密則不如也從叔混特知愛之襲封康樂公食邑二千戶以國公例除員外散騎侍郎

不就為琅邪王大司馬行參軍性豪侈車服鮮麗衣裳  
器物多改舊制世共宗之咸稱謝康樂也劉毅鎮江陵  
以為衛軍從事中郎毅伏誅武帝拔為太尉行參軍累  
遷祕書丞坐事免武帝征長安靈運為世子中軍諮議  
參軍黃門侍郎奉使慰勞武帝於彭城使撰西征賦其  
辭甚麗後為相國從事中郎遷世子左衛率坐輒殺門  
生免官宋受命降公爵為侯起為散騎常侍轉太子左  
衛率靈運性褊傲多愆禮度朝廷唯以文義處之不以

應實相許自謂才能宜參權要既不見知常懷憤惋廬陵王義真少好文籍與靈運情款異常少帝即位權在大臣靈運構扇異同非毀執政司徒徐羨之等惡之出為永嘉太守郡中有名山水靈運素所愛好出守既不為志遂肆意遊遨徧歷諸縣動踰旬朔理民聽訟不復關懷所至輒為詩詠以致其意在郡一周稱疾去職從弟晦曜弘微等並與書止之不從靈運父祖並葬始寧縣并有故宅及墅遂移籍會稽修營舊業傍山帶江盡

幽居之美與隱士王弘之孔淳之等放蕩為娛有終焉之志每有一首詩至都邑貴賤莫不競寫宿昔之間士庶皆徧遠近欽慕名動京師作山居賦并自注以言其事文帝登阼誅徐羨之等徵為祕書監再召不起上使光祿范泰與靈運書敦獎之乃出就職使整祕閣書遺闕又以晉氏一代自始至終無一家之史令靈運撰晉書粗立條流書竟不就尋遷侍中日夕引見賞遇甚厚靈運詩書皆兼獨絕每文竟手自寫之文帝稱為二寶

既自以名輩才能應參時政初被召便以此自許既至  
文帝唯以文義見接每侍上晏談賞而已王曇首王華  
殷景仁等名位素不踰之並見任遇靈運意甚不平多  
稱疾不朝直穿池植援種竹樹果驅課公役無復期度  
出郭遊行或一百六七十里經旬不歸既無表聞又不  
請急上不欲傷大臣諷旨令自解靈運乃上表陳疾上  
賜假東歸將行上書勸伐河北靈運宴遊集會以夜續  
晝復為御史中丞傅隆奏免官是歲元嘉五年也靈運



既東還與族弟惠連東海何長瑜潁川荀雍泰山羊璿  
之以文章賞會共為山澤之遊時人謂之四友惠連幼  
有才悟而輕薄不為父方明所知靈運去永嘉還始寧  
時方明為會稽郡靈運嘗自始寧至會稽造方明遇惠  
連大相知賞靈運性無一所推唯重惠連與為刎頸交  
時長瑜教惠連讀書亦在郡內靈運又以為絕倫靈運  
謂方明曰阿連才悟如此而尊作常兒遇之何長瑜當  
今仲宣而飴以下客之食尊既不能禮賢宜以長瑜還

靈運載之而去荀雍字道雍官至散騎郎璿之字曜璠  
為臨川內史被遇於竟陵王誕誕敗坐誅長瑜才亞惠  
連雍璿之不及也臨川王義慶招集文士長瑜自國侍  
郎至平西記室參軍嘗於江陵寄書與宗人何勗以韻  
語序義慶州府僚佐云陸展染白髮欲以媚側室青青  
不解久星星行復出如此者五六句輕薄遂演而廣之  
凡厥人士並為題目皆加劇言苦句其文流行義慶大  
怒白文帝除為廣州所統增城令及義慶薨朝士並詣

第叙哀何勗謂袁淑曰長瑜便可還也淑曰國新喪未  
宜以流人為念廬陵王紹鎮尋陽以長瑜為南中郎行  
參軍掌書記之任行至版橋遇暴風溺死靈運因父祖  
之資生業甚厚奴僮既衆義故門生數百鑿山浚湖功  
役無已尋山陟嶺必造幽峻巖嶂數十重者莫不備盡  
登躡常着木屐上山則去其前齒下山則去其後齒嘗  
自始寧南山伐木開徑直至臨海從者數百臨海太守  
王琇驚駭謂為山賊後知靈運乃安又要琇更進琇不

肯靈運贈之詩曰邦君難地險旅客易山行在會稽亦  
多徒衆驚動縣邑太守孟顓事佛精懇而為靈運所輕  
嘗謂顓曰得道應須慧業文人生天當在靈運前成佛  
必在靈運後顓深恨此言又與王弘之諸人出千秋亭  
飲酒裸身大呼顓深不堪遣信相聞靈運大怒曰身自  
大呼何關癡人事會稽東郭有回踵湖靈運求決以為  
田文帝令州郡履行此湖去郭近水物所出百姓惜之  
顓堅執不與靈運既不得回踵又求始寧岵嶴湖為田

顓復固執靈運以顓非在利民正慮決湖多害生命言  
論傷之與顓遂為讎隙顓因靈運橫恣百姓驚擾乃表  
其異志發兵自防露版上書靈運馳詣闕上表自陳本  
末文帝知其見誣不罪也不欲復使東歸以為臨川內  
史在郡游放不異永嘉為有司所糾司徒遣使隨州從  
事鄭望生收靈運靈運興兵叛逸遂有逆志為詩曰韓  
亡子房奮秦帝魯連耻本自江海人忠義感君子追討  
禽之送廷尉治罪奏論斬刑上愛其才欲免官而已彭

城王義康堅執謂不宜恕詔以謝玄勲參微管宜宥及後嗣可降死一等徙廣州後秦郡府將宋齊受使至涂口行達桃墟村見有七人下路聚語疑非常人還告郡縣遣兵隨齊掩討禽之其一人姓趙名欽云同村薛道雙先與靈運共事道雙因同村成國報欽云靈運犯事徙廣州給錢令買弓箭刀楯等物使道雙要合鄉里健兒於三江口篡之若得者如意後功勞是同遂合部黨要謝不得及還饑饉緣路為劫有司奏收之文帝詔於

廣州棄市臨死作詩曰龔勝無餘生李業有終盡嵇公  
理既迫霍生命亦殞所稱龔勝李業猶前詩子房魯連  
之意也時元嘉十四年年四十九所著文章傳於世孟  
顗字彥重平昌安丘人衛將軍昶弟也昶顗並美風姿  
時人謂之雙珠昶貴盛顗不就辟昶死後顗歷侍中僕  
射太子詹事散騎常侍左光祿大夫嘗就徐羨之因叙  
關洛中事顗歎劉穆之終後便無繼者王弘亦在甚不  
平曰昔魏朝酷重張邵謂不可一日無之及邵死何關

興廢顛不悅衆賓笑而釋之後卒於會稽太守靈運子鳳坐靈運徙嶺南早卒鳳子超宗列在齊史

謝密字弘微晉西中郎將万之曾孫尚書左僕射景仁從子也祖韶車騎司馬父思武昌太守弘微年十歲繼從叔峻名犯所繼內諱故以字行童幼時精神端審時然後言所繼叔父混名知人見而異之謂思曰此兒深中夙敏方成佳器有子如此足矣峻司空琰之子也於弘微本服總親戚中表素不相識率意承接皆合禮衷



義熙初襲爵建昌縣侯弘微家素貧儉而所繼豐泰唯  
受書數千卷國吏數人而已遺財祿秩一不關預混聞  
而驚嘆謂國郎中令漆凱之曰建昌國祿本應與北舍  
共之國侯既不措意今可依常分送弘微重建混言乃  
少有所受北舍弘微本家也混風格高峻少所交納唯  
與族子靈運瞻晦曜弘微並以文義賞會常共宴處居  
在烏衣巷故謂烏衣之遊混五言詩所云昔為烏衣遊  
戚戚皆親姓者也其外雖復高流時譽莫敢造門瞻等

才辭富贍弘微每以約言服之混特所敬重號曰微子  
謂瞻等曰汝諸人雖才義豐辯未必皆愜衆心至於領  
會機賞言約理要故當與我共推微子常云阿遠剛躁  
負氣阿客博而無檢曜仗才而持操不篤晦自知而納  
善不周設復功濟三才終以此為恨至於微子吾無間  
然又云微子異不傷物同不害正若年造六十必至公  
輔嘗因酣讌之餘為韻語以獎勸靈運瞻等曰康樂誕  
通度實有名家韻若加繩染功剖瑩乃瓊瑾宣明體遠

識穎達且沈雋若能去方執穆穆三才順阿多標獨解  
弱冠纂華屑質勝誠無文其尚又能峻通遠懷清悟采  
采標蘭訊直轡鮮不躡抑用解偏吝微子基微尚無倦  
由慕蘭勿輕一簣少進往必千仞數子勉之哉風流由  
爾振如不犯所知此外無所慎靈運瞻等並有誠厲之  
言唯弘微獨盡褒美曜弘微兄多其小字通遠即瞻字  
客兒靈運小名晉世名家身有國封者起家多拜員外  
散騎侍郎弘微亦拜此仍為瑯邪王大司馬參軍義熙

八年混以劉毅黨見誅混妻晉陵公主改適琅邪王練  
公主雖執意不行而詔與謝氏離絕公主以混家事委  
之弘微混仍世宰輔一門兩封田業千餘處僮僕千人  
唯有二女並數歲弘微經紀生業事如在公一錢尺帛  
出入皆有文簿武帝受命晉陵公主降為東鄉君以混  
得罪前代東鄉君節義可嘉聽還謝氏自混亡至是九  
年而室宇修整倉廩充盈門徒僕使不異平日東鄉君  
歎曰僕射平生重此一子可謂知人僕射為不亡矣中

外姻親道俗義舊見東鄉之歸者入門莫不歎息或為  
流涕感弘微之義也性嚴正舉止必修禮度事繼親之  
黨恭謹過常伯叔二母歸宗兩姑晨夕瞻奉盡其誠敬  
內外或傳語通訊輒正其衣冠婢僕之前不妄言笑由  
是尊卑大小敬之若神有蔡湛之者及見謝安兄弟謂  
人曰弘微貌類中郎而性似文靖文帝初封宜都王鎮  
江陵以琅邪王球為友弘微為文學母憂去職居喪以  
孝稱服闋蔬素踰時文帝即位遷黃門侍郎與王華王

曇首殷景仁劉湛等號曰五臣遷尚書吏部郎參預機  
密尋轉右衛將軍文帝故吏臣佐並委弘微選擬居身  
清約器服不華而飲食滋味盡其豐美兄曜歷御史中  
丞彭城王義康驃騎長史卒官弘微哀戚過禮縗服雖  
除猶不啖魚肉會沙門釋惠琳詣弘微與之共食猶獨  
蔬素琳曰檀越素既多疾即吉之後猶未復膳若以無  
益傷生豈所望於得理弘微答曰衣冠之變禮不可踰  
在心之哀實未能已遂廢食感咽歔歔不自勝弘微少

孤事兄如父友睦之至舉世莫及口不言人短見兄曜  
好臧否人物每聞之常亂以他語歷位中庶子加侍中  
志在素宦畏忌權寵固讓不拜乃聽解中庶子每獻替  
及陳時事必手書焚草人莫之知上以弘微能營膳羞  
嘗就求食弘微與親舊經營及進之後親人問上所御  
弘微不答別以餘語酬之時人比之漢世孔光及東鄉  
君薨遺財千萬園宅十餘所又會稽吳興琅邪諸處太  
傅安司空琰時生業奴僮猶數百人公私咸謂室內資

財宜歸二女田宅僮僕應入弘微弘微一無所取自以私祿營葬混女夫殷叡好撝撝聞弘微不取財物乃濫奪其妻妹及伯母兩姑之分以還戲責內人皆化弘微之讓一無所爭弘微舅子領軍將軍劉湛不堪其非謂弘微曰天下事宜有裁衷卿置此不問何以居官弘微笑而不答或有譏之曰謝氏累世財產充殷君一朝戲責卿視而不言譬棄物江海以為廉耳弘微曰親戚爭財為鄙之甚今內人尚能無言豈可導之使爭令分多



共少不致有乏身死之後豈復見關東鄉君葬混墓開  
弘微牽疾臨赴病遂甚元嘉十四年卒年四十二文帝  
歎息甚至謂謝景仁曰謝弘微王曇首年踰四十名位  
未盡其才此朕之責也弘微性寬博無喜愠末年嘗與  
友人碁友人西南碁有死勢復一客曰西南風急或有  
覆舟者友悟乃救之弘微大怒投局於地識者知其暮  
年之事果以此歲終時有一長鬼寄司馬文宣家言被  
遣殺弘微弘微疾每劇輒預告文宣及弘微死與文宣

分別而去弘微臨終語左右曰有二厨書須劉領軍至可於前燒之慎勿開也書是文帝手勅上甚痛惜之使二衛千人營畢葬事追贈太常弘微與琅邪王慧王球並以簡淡稱人謂沈約曰王慧何如約曰令明簡次問王球約曰倩玉淡又次問弘微約曰簡而不失淡而不流古之所謂名臣弘微當之其見美如此子莊字希逸七歲能屬文通論語及長美容儀文帝見而異之謂尚書僕射殷景仁領軍將軍劉湛曰藍田生玉豈虛也哉

初為始興王濬後軍法曹行參軍遷隨王誕後軍諮議  
領記室分左氏經傳隨國立篇製木方丈圖山川土地  
各有分理離之則州郡別殊合之則寓內為一元嘉二  
十七年魏攻彭城遣尚書李孝伯與鎮軍長史張暢共  
語孝伯訪問莊及王微其名聲遠布如此二十九年除  
太子中庶子時南平王鐸獻赤鸚鵡普詔羣臣為賦太  
子左衛率袁淑文冠當時作賦畢以示莊莊賦亦就淑  
見而歎曰江東無我卿當獨秀我若無卿亦一時之傑

也遂隱其賦元凶弑逆轉司徒左長史孝武入討密送檄書與莊令加改正宣布之莊遣腹心門生具慶奉啓事密詣孝武陳誠及帝踐阼除侍中時魏求通互市詔羣臣博議莊議以為拒而觀釁有足表彊驃騎竟陵王誕當為荊州徵丞相荊州刺史南郡王義宣入輔義宣固辭不入而誕便剋日下船莊以丞相既無入志而驃騎發便有期如似欲相逼切帝乃申誕發日義宣竟亦不下孝建元年遷左將軍莊有口辯孝武嘗問顏延之

曰謝希逸月賦何如答曰美則美矣但莊始知隔千里  
兮共明月帝召莊以延之答語語之莊應聲曰延之作  
秋胡詩始知生為久離別沒為長不歸帝撫掌竟日又  
王元謨問莊何者為雙聲何者為疊韻答曰元護為雙  
聲礪礪為疊韻其捷速若此初孝武帝賜莊寶劍莊以  
與豫州刺史魯爽送別爽後反叛帝因宴集問劍所在  
答曰昔以與魯爽別竊為陛下杜郵之賜止甚悅當時  
以為知言于時搜才路狹莊表陳求賢之義曰今九服

之曠九流之艱提鈞懸衡委之選部一人之鑒易限天下之才難源宜普命大臣各舉所知以付尚書依分銓用若任得其才舉主延賞有不稱職宜及共坐又政平訟理莫先親民親民之要實歸守宰故黃霸涖潁川累稔杜畿居河東歷載或就加恩秩或入崇輝寵今涖人之職宜遵六年之限進得章明庸惰退得人不勤勞如此則考績之風泰矣詔付詳議事不施行初文帝世限年三十而仕郡縣六周乃選代刺史或十年餘至是皆

易之仕者不拘長少涖人以三周為滿宋之善政於是  
乎哀是年拜吏部尚書莊素多疾不願居選部與大司  
馬江夏王義恭牋自陳曰稟生多病兩脇痺疾殆與生  
俱一月發動不減兩三每痛來逼心氣餘如綖利害數  
年遂成痼疾岷岷惛惛常如行尸復以眼患五月來便  
不得夜坐恒閉帷避風晝夜惛惛為此不復得朝謁諸  
王慶弔親舊今之所止唯在小閣持此苦生而使銓綜  
九流應對無方可乎下官微命於天下至輕在已不能

不重家世無年亡高祖四十曾祖三十三亡祖四十七  
下官新歲便四十五加以疾患如此當復幾時見聖世  
然亦是下官生運不應一見閭逸今不敢復言此當付  
之來生耳屢經投請未蒙哀許良由誠淺辭訥不足上  
感願侍坐言次賜垂拯助庶獲哀允後坐疾多免官大  
明元年起為都官尚書奏改定刑獄按驗重囚之制上  
時親攬朝政常慮權移臣下以吏部尚書選舉所由欲  
輕其勢力乃下詔吏部尚書可依郎分置并詳省閑曹



又別詔太宰江夏王義恭曰循常甚易改舊生疑但吏部尚書由來與錄共選良以一人之識不辨洽通兼與奪威權不宜專一故也於是置吏部尚書二人省五兵尚書莊及度支尚書顧顗之並補選職遷右衛將軍加給事中時河南獻舞馬詔羣臣為賦莊所上甚美又使莊作舞馬歌令樂府歌之五年又為侍中領前軍將軍時孝武出行夜還勅開府門莊居守以榮信或虛執不奉旨須墨詔乃開上後因宴從容曰卿欲效郅君章邪

曰臣聞蒐巡有度郊祀有節盤于遊田著之前誠陛下  
今蒙犯塵露晨待宵還容致不逞之徒妄生矯詐臣是  
以伏須神筆乃敢開門耳六年又為吏部尚書領國子  
博士坐選公車令張竒免官事在顏師伯傳後除吳郡  
太守前廢帝即位以為金紫光祿大夫初孝武寵姬殷  
貴妃薨莊為誄文云贊軌堯門引漢昭帝母趙婕妤  
母門事廢帝在東宮銜之至是遣人詰責莊曰卿昔作  
殷貴妃誄知有東宮不將誄之孫奉伯說帝曰死是人

之所同政復一往之苦不足為深困莊少長富貴今且  
繫之尚方使知天下苦劇然後殺之未晚帝曰卿言有  
理明帝定亂得出使為赦詔莊夜出署門方坐命酒酌  
之莊已微醉傳詔停待詔成甚工後為尋陽王師加中  
書令尋加散騎常侍金紫光祿大夫給親信二十人卒  
贈右光祿大夫謚憲子時年四十六所著文章四百餘  
首行於世五子颺肱颺從濤世謂莊名子以風月景山  
水颺位晉平太守女為順帝皇后追贈金紫光祿大夫

臚列在齊史

王弘字休元琅邪臨沂人也曾祖導晉丞相祖洽中領  
軍父珣司徒弘少好學以清悟知名弱冠為會稽王道  
子驃騎主簿時農務頓息末役繁興弘於是建屯田之  
策珣頗好積聚財物布在民間珣薨弘悉燔券書一不  
收責其餘舊業悉以委付諸弟時內外多難在喪者皆  
不得終其哀惟弘徵召一無所就桓玄克城邑收道子  
付廷尉臣吏畏恐莫敢瞻送弘時尚在喪獨於道側拜

辭攀車涕泣論者稱焉武帝為鎮軍將軍召補諮議參  
軍以功封華容縣五等侯義熙十一年召為太尉長史  
從北征前鋒已平洛陽而未遣九錫弘銜使還京師諷  
旨朝廷時劉穆之掌留任而旨反從北來穆之愧懼發  
病遂卒宋國初建遷為尚書僕射掌選領彭城太守奏  
彈世子左衛率謝靈運為軍人桂興淫其嬖妾殺興江  
涘棄尸洪流御史中丞王准之曾不彈舉此而勿罰典  
刑將替武帝答曰端右肅正風軌誠副所期自今以為

永制於是免靈運官十四年遷江州刺史省賦簡役百姓便之以佐命功封華容縣公三年入朝進號衛將軍開府儀同三司武帝因宴集謂羣公曰我布衣始望不至此傅亮之徒並撰辭欲盛稱功德弘率爾對曰此所謂天命求之不可得推之不可去時人稱其簡舉少帝景平二年徐羨之等謀廢立召弘入朝文帝即位以定策安社稷進位司空封建安郡公上表固辭見許進號車騎大將軍開府刺史如故徐羨之等以廢弑之罪將

見誅弘以非首謀且弟曇首又為上所親委事將發密使報弘羨之等誅召弘為侍中司徒揚州刺史錄尚書事給班劍三十人上西征謝晦與彭城王義康居守入住中書下省引隊伍出入司徒府權置參軍元嘉五年春大旱弘引咎遜位先是彭城王義康為荊州刺史鎮江陵平陸令河南成粲與弘書誠以盈滿兼陳彭城王宜入知朝政竟陵衡陽宜出據列藩弘由是固自陳請乃遷為衛將軍開府儀同三司六年弘又上表陳彭城

王宜入輔并求解州義康由是代弘為司徒與之分錄  
弘又辭分錄弘博練治體留心庶事斟酌時宜每存優  
允數上疏陳便宜上皆從之及弟曇首亡文帝嗟悼不  
已見弘流涕歔歔弘斂容而已既而彭城王義康言於  
帝曰曇首既為家寶又為國器弘情不稱何也帝曰賢  
者意不可度其見體亮如此九年遷位太保領中書監  
餘如故其年薨贈太保中書監給節加羽葆鼓吹增班  
劔為六十人謚曰文昭公配食武帝廟庭弘明敏有思



致既為人望所宗造次必存禮法凡動止施為及書翰儀體後人皆依倣之謂為王太保家法雖歷任藩輔而不營財利薨亡之後家無餘業而輕率少威儀客有疑其諱者弘曰家諱與蘇子高同性又褊隘人有忤意者輒加詈辱少嘗擣捕公城子野舍及後當權有人就弘求縣此人常以捕戲得罪弘詰之曰君得錢會戲何用祿為答曰不審公城子野何所在弘默然自領選及當朝錄將加榮爵於人者每先呵責譴辱之然後施行若

美相眄接語欣懽者必無所諧人問其故答曰王爵既加於人又相撫勞便成與主分恩此所謂姦以事君者也若求者絕官叙之分既無以為惠又不微借顏色即大成怨府亦鄙薄所不任問者悅服子錫嗣錫字寡光位太子左衛率江夏內史高自位遇太尉江夏王義恭當朝錫箕踞大坐殆無推敬卒弟僧亮嗣齊受禪降爵為侯僧亮弟僧衍位侍中僧衍弟僧達幼聰敏弘為揚州時僧達六七歲遇有通訟者竊覽其辭謂為有理及

大訟者亦進弘意其小留左右僧達為申理闇誦不失  
一句凡錫質訥之風采文帝聞僧達早慧召見於德陽  
殿問其書學及家事應對閑敏上甚知之妻以臨川王  
義慶女年二十以為後軍參軍遷太子舍人坐屬疾而  
於揚列橋觀鬪鴨為有司所糾原不問性好鷹犬與閭  
里少年相馳逐又躬自屠牛義慶聞其如此令周旋沙  
門慧觀造而觀之僧達陳書滿席與論文義慧觀酬答  
不暇深相稱美僧達訴家貧求郡文帝欲以為秦郡吏

部郎庾仲文曰王弘子既不宜作秦郡僧達亦不堪泣  
民乃止遷太子洗馬母憂去職與兄錫不協錫罷臨海  
郡送故及奉祿百萬以上僧達一夕令奴輩取之無復  
所餘服闋為宣城太守性好遊獵而山郡無事僧達肆  
意馳騁或三五日不歸受詞辯訟多在獵所民或逢不  
識問府君所在僧達報曰在近其後徙義興元凶弒立  
孝武入討普檄諸州郡劭又符郡發兵僧達未知所從  
因客說逆順之勢乃奔孝武於鵲頭初孝武發尋陽沈

慶之謂人曰王僧達必來赴難人問其所以慶之曰虜馬飲江王出赴難見其在先帝前議論開張執意明決以此言之其必至也僧達尋至孝武即以為長史及即位以為尚書右僕射轉護軍將軍僧達自負才地謂為當時莫及上初踐阼即居端右一二年間便望宰相嘗答詔曰亡父亡祖司徒司空其自負若此後為護軍將軍不得志乃啓求徐州上不許僧達三啓固陳上甚不悅乃以為吳郡太守時暮歲五遷彌不得意吳郭西臺

寺多富沙門僧達求須不稱意乃遣主簿顧曠率門義  
劫寺內沙門竺法瑤得數百萬荊州江夏反叛加僧達  
置佐領兵臺符聽置千人而輒立三十隊隊八十人立  
宅於吳多役功力坐免官後孝武獨召見傲然了不陳  
遜唯張目而視及出帝歎曰王僧達非狂如何乃戴面  
向天子後顏師伯詣之僧達慨然曰大丈夫寧當玉碎  
安可以沒沒求活師伯不答逡巡便退初僧達嘗為太  
子洗馬在東宮愛念軍人朱靈寶及出為宣城靈寶已

長僧達詐列靈寶死亡寄宣城左永籍之注以為己子  
改名元序啓孝武以為武陵國典衛令又以補竟陵國  
典書令建平國中軍將軍久之事發又加禁錮表謝言  
不能因依左右傾意權貴以至廢黜上愈怒僧達族子  
確年少美姿容僧達與之私款確叔父休為永嘉太守  
當將確之郡僧達欲逼留之確知其意避不往僧達潛  
於所住屋後作大阮欲誘確來別殺埋之從弟僧虔知  
其謀禁呵乃止御史中丞劉瑀奏請收治上又不許孝

建二年除太常意久不悅頃之上表解職文旨抑揚詔付門下侍中何偃以其辭不遜啓付南臺又坐免官先是何尚之致仕復膺朝命於宅設八關齋大集朝士自行香次至僧達曰願郎且放鷹犬勿復游獵僧達答曰家養一老狗放無處去去已復還尚之失色大明中以歸順功封寧陵縣五等侯累遷中書令黃門郎路瓊之太后兄慶之孫也宅與僧達門並嘗盛車服詣僧達僧達將獵已改服瓊之就坐僧達了不與語謂曰身昔門



下騶人路慶之者是君何親遂焚瓊之所坐牀太后怒  
泣涕於帝曰我尚在而人陵之我死後乞食矣帝曰瓊  
之年少無事詣王僧達門見辱乃其宜耳僧達貴公子  
豈可以此罪加乎太后又謂帝曰我終不與王僧達俱  
生先是南彭城蕃縣人高閤沙門釋曇標道方等共相  
誑惑自言有鬼神龍鳳之瑞常聞簫鼓音與秣陵人藍  
宕期等謀為亂又結殿中將軍苗乞食等起兵攻宮門  
事發凡黨與死者數十人僧達屢經犯忤以為終無悛

心因高閹事陷之收付廷尉於獄賜死時年三十六帝亦以為恨謂江夏王義恭曰王僧達遂不免死追思太保餘烈使人慨然於是詔太保華容文昭公門爵國姻一不貶絕時有蘇寶者名寶生本寒門有文義之美官至南臺侍御史江寧令知高閹謀反不即聞啓亦伏誅僧達子道琰徙新安元徽中為廬陵內史未至郡卒子融齊史有傳

王微字景元太保弘弟光祿大夫孺之子也微少好學

善屬文工書兼解音律及醫方卜筮陰陽數術之事文帝賜以名著初為始興王友父憂去職微素無宦情服闋除南平王鑠右軍諮議參軍仍為中書侍郎時兄遠免官歷年微歎曰我兄無事而屏廢我何得而叨忝踰分文帝即以遠為光祿勳微為文好古言頗抑揚袁淑見之謂為訴屈吏部尚書江湛舉微為吏部郎微確守不拔時論者或云微之見舉廬江何偃亦參其議偃慮為微所咎與之書自陳微報書深言塵外之適其從弟

僧綽仰視謂曰此上不欺人非智者其孰能免之遂辭  
不就尋有元凶之變微常住門屋一間尋書玩古遂足  
不履地終日端坐牀席皆生塵埃唯當坐處獨淨弟僧  
謙亦有才譽為太子舍人遇疾微躬自處療而僧謙服  
藥失度遂卒深自咎恨發病不復自療哀痛僧謙不能  
已以書告靈僧謙卒後四旬而微終遺令薄葬不設輜  
旒鼓挽之屬施五尺牀為靈二宿便毀以常所彈琴置  
牀上何長史偃來以琴與之無子家人遵之所著文集

傳於世贈秘書監微兄遠字景舒位光祿勳時人謂遠如屏風屈曲從俗能蔽風露言能不乖物理也遠子僧祐列在齊史

王曇首太保弘之弟也幼而素尚除著作郎不就兄弟分財曇首唯取圖書而已辟琅邪王大司馬屬從府公修復洛陽園陵與從弟球俱詣武帝時謝晦在坐武帝曰此君並膏粱世德乃能屈志戎旅曇首答曰既從神武之師自使懦夫立志晦曰仁者果有勇帝悅行至彭

城武帝大會戲馬臺預坐者並賦詩曇首詩先成帝覽  
讀問王弘曰卿弟何如卿答曰若但如下官門戶何寄  
帝大笑曇首有智局喜愠不見於色閨門之內雍雍如  
也手不執金玉婦女亦不得以為飾玩自非祿賜所及  
一毫不受於人文帝為冠軍將軍留鎮彭城以曇首為  
府功曹移鎮江陵隨府轉鎮西長史武帝甚知之謂文  
帝曰曇首沈毅有器度輔相才也汝可每事諮之景平  
中有龍見西方半天騰上廕五彩雲京都遠近聚觀太

史奏曰西方有天子氣及文帝被迎入奉大統上及議者皆致疑不敢下曇首與到彥之從兄華並勸上行上猶未許曇首固諫并言天人符應上乃下率府州文武嚴兵自衛臺所遣百官衆力不得近部伍中兵參軍朱容子抱刀在平乘戶外不解帶者累旬既下在道有黃龍躍出負上所乘舟上左右皆失色上謂曇首曰此乃夏禹所以受天命我何德以堪之及即位又謂曇首曰非宋昌獨見無以致此以曇首為侍中領驍騎將軍以

朱容子為右軍將軍誅徐羨之等及平謝晦皆曇首及華之力也元嘉四年車駕出北堂使三更竟開廣莫門南臺云應須白虎幡銀字榮不肯開門尚書左丞羊元保奏免御史中丞傅隆以下曇首繼奏曰既無墨勅又闕幡榮雖稱上旨不異單刺元嘉元年二月雖有再開門例此乃前事之違今之守舊未為非禮其不請白虎幡銀字榮致開門不時由尚書相承之失亦合糾正於是上特無所問更立科條遷太子詹事侍中如故自謝



晦平後上欲封曇首等會譙集舉酒勸之因拊御牀曰  
此坐非卿兄弟無復今日時封詔已訖出以示曇首曇  
首曰近日之事釁難將成賴陛下英明速斷故罪人斯  
戮臣等雖仰憑天光効其毫露豈可因國之災以為身  
幸陛下雖欲私臣當如直史何上不能奪故其封事遂  
寢時兄弘錄尚書事又為揚州刺史曇首為上所親委  
任兼兩宮彭城王義康與弘並錄意常怏怏又欲得揚  
州以曇首居中分其權任愈不悅曇首固乞吳郡文帝

曰豈有欲建大厦而遺其棟梁者哉賢兄比屢稱疾固辭州任將來若相申許者此處非卿而誰時弘久疾不朝屢遜位不許義康謂賓客曰王公久疾不起神州詎合卧臨曇首勸弘減府兵力之半以配義康義康乃悅七年卒時年三十七文帝臨慟嘆曰王詹事所疾不救國之衰也中書舍人周赳侍側曰王家欲衰賢者先殞上曰直是我家衰耳贈光祿大夫九年以預議誅徐羨之功追封豫章縣侯謚曰文孝武即位配饗文帝廟庭

子僧綽嗣僧綽幼有大成之度衆便以國器許之好學  
練悉朝典年十三文帝引見拜便流涕哽咽上亦悲不  
自勝襲封豫章縣侯尚文帝長女東陽獻公主初為江  
夏王義恭司徒參軍累遷尚書吏部郎參掌大選究識  
流品諳悉人物拔才舉能咸得其分遷侍中任其機密  
僧綽深沈有局度不以才能高人先是父曇首與王華  
並為文帝所任華子嗣才劣位遇亦輕僧綽嘗謂中書  
侍郎蔡興宗曰弟名位與新建齊弟超至今日蓋由姻

戚所致也新建者嗣之封也僧綽為侍中時年二十九始興王濬嘗問其年僧綽自嫌早達逡巡良久乃答其謙退若此元嘉末文帝頗以後事為念以其年少方欲大相付託朝政小大皆參焉位雖未隆而任同宰輔從兄微清介士也懼其太盛勸令抑損僧綽乃求吳郡及廣州上並不許會二凶巫蠱事泄上獨先召僧綽具言之及將廢立使尋求前朝舊典劭於東宮夜饗將士僧綽密以啓聞上又令撰漢魏以來廢諸王故事撰畢送

與江湛徐湛之欲立隨王誕江湛欲立南平王鐸文帝  
欲立建平王宏故議久不決誕妃即湛之女鐸妃即湛  
妹也帝謂僧綽曰諸人各為身計更無與國家同憂者  
僧綽曰建立之事仰由聖懷臣謂唯宜速斷幾事須密  
不可使難生慮表取笑千載上曰卿可謂能斷大事此  
事不可不殷勤且庶人始亡人將謂我無復慈愛之道  
僧綽曰恐千載之後言陛下惟能裁弟不能裁兒上默  
然江湛出閣謂僧綽曰卿向言將不傷直邪僧綽曰弟

亦恨君不直及劭弑逆江湛在尚書上省聞變歎曰不用王僧綽言以至於此劭既立轉僧綽吏部尚書頃之劭檢文帝巾箱及江湛家書疏得僧綽所啓饗士卒并廢諸王事乃收害焉因此陷北第諸侯王以為與僧綽有異志孝武即位追贈金紫光祿大夫謚曰愍侯初太社西空地一段本吳時丁奉宅孫皓流徙其家江左初為周顗蘇峻宅其後為袁悅宅又為章武王司馬秀宅皆以凶終後給臧燾亦頻遇禍故世稱為凶地僧綽常

以正達自居謂宅無吉凶請以為第始就造築未及居而敗子儉列在齊史

通志卷一百三十二





總校官庶吉士臣侍朝

校對官庶吉士臣嚴福

謄錄監生臣顧振